



# SchlössliTimes

Ussgob 23



Februar 2017

## s' schmeckt nach Fasnacht!

In dere Ussgob:

Blaggeddeussgob	2
Episode 11.11.	3
Heimspiil 2016	4
Mimösli 2017	5/6
Impressione Mimösli	7
9mo entweder oder...	8

D'Kostüm sind gneiht... d'Larve scho fascht parrat... d'Farb uff de Zoggeli fascht troche.. d'Vorfreud stigt vo Prob zu Prob, vo Tag zu Tag... Es schmeckt nach Fasnacht!

S'Mimösli isch vorbi, ämmel für uns Schlösslis. E mega Projäkt isch das gsi... e super Zit hämmer verbrocht! Genauer erfahred ihr in dere Ussgob vo dr SchlössliTimes. Jetzt gilts in de letschte Probe vor dr Fasnacht no guet an unserem Repertoire z'schaffe.

Denn durch unser mitwirke am Mimösli hämmer dr Grossteil vo de Lieder sit Wuchene gar nüm agluegt. Das gilts jetzt uffzhole zum an dr Fasnacht parat zsii. Will sunscht ... jä sunscht spiile mr halt nur drei Lieder die ganz Fasnacht dure. Aber das isch jo au nid d'Lösig ;-) Drumm hänge mr uns jetzt nomol voll dri und göhn in grosse Schritt uff d'Fasnacht zue! Und dänked bitte alli dra. Ab sofort wird jede Täller leer gässe!!! Das mr au jo viel Sunne hän an dr Fasnacht! Wobi... schlimmer wie letschtjohr chas jo eh nid wärde!

Mir sehn uns gli an dr Fasnacht! Oooooooh Zämme neume ane!

Matti-Babbe-Fischi

Immer ufem laufende uf:

[www.schloessli-schraenzer.ch](http://www.schloessli-schraenzer.ch)

### Schlössli-Schränzer FASNACHT 2017

18. Februar	Waagefescht, Löhrenacker Areal Aesch
22. Februar	Proklomation Hochwald / SO
24. Februar	Geisterball, Sädelgeister Zufikon/ AG
25. Februar	Waagetaufi Bärefelswaggis
<b>26.-28. Februar</b>	<b>Fasnacht Aesch</b>
07. März	Fasnacht Basel
19. März	Bummel



## Blaggeddeussgob 07. Januar 2017

Wie jedes Jahr isch d' Blaggeddeussgob dr eigentlichi Startschuss in d'Fasnacht. Me trifft die andere Fasnächtler und Fründe wo me vielleicht s'Johr dure nid ganz so viel gseht und het e guet Obe Zämme!

Für d' Schlössli het dr Obe, oder besser gseit dr Nomidaag bi dr Jenny, dr Angi und em Thierry dehei agfange. Die Drei händ nämlich zume Apéro iglade. Wobi Apéro jo scho fascht liicht untertriebe isch. Es het so viel feini Sache zum ässe gha, i glaub Sie zehre hüt no drfo... Nomol merci viel mol Euch drei, für dä super Start in Obe. Wo denn Alli ihres Bierli, Fröschli oder Bleychügeli usstrunke gha händ, hets denn um die 5i umme gheisse parat mache füre Sternemarsch. Am Strosserand hets scho e paar lüt gha wo uns zueglost händ, und natürlich, im und ums Feschztält händ aktivi und passivi Fasnächtler uff alli Guggene gewartet, wo vo überall här ufe Schlossplatz gloffe sind. Traditionell hän denn alli Guggemuusige zämme 2 Lieder gespiilt, s'het aber so richtig gschränzt! D'Bsuecher händ sich chöne an dr Bar mit feine Getränk versorge, oder mit feinem Ässe verpfle. Gli scho isch d'Blaggedde und s'Sujet vo dr Fasnacht 2015 vorgstellt worde. „Ä chli spöter“ isch s'Sujet und spiilt somit uf e spöteri Schuelbeginn vo dr Sekundarstufe a. D' Blaggedde zeigt e Waggis, wo am Zeiger vom Wecker hängt und so d' Zit nach hintere stellt. Gli druffabe isch denn au scho wie gwohnt dr Räggeischt cho und d'Guggene händ Ihri Ufftritt gha. Zwüsche de Guggene händ d' Schloss-Buam mit Ihrem Schlager-Party Mix für Stimmig gsorgt. Natürlich hän au mir unsere Ufftritt gha und händ s' Publikum mit unserem Sound versuecht z'unterhalte. Isch uns glaub glunge ;-)



Nach unserem Ufftritt hets d'Schlössli wie gwohnt chli im Dorf verstreut. Die Einte sind no bitz im Zält bliibe, e Grossteil hän d'Schöpflihar hinterem Frohsinn in Beschlag gnoh und anderi sind nomol zur Jenny, dr Angi und em Thierry heime an „d' Aftershow“ Party! Schiins hets no paar Schärbe gäh dörte...

Es isch wiedermol e glunge und füechtfröhlich Startschuss gsi in d'Fasnachtszyt. D'Vorfreud stigt!!!!

Matti-Babbe-Fischi



# Fasnacht Aesch 2017

Ä chli spöter



	Samstag 18.2.2017	Donnerstag 23.2.2017	Sonntag 26.2.2017	Montag 27.2.2017	Dienstag 28.2.2017	Sonntag 05.3.2017
14:00Uhr		Chinderumzug 	Fasnachtsumzug Salzenfasnacht 			
16:00Uhr	Wagefesch 					
19:00Uhr				Faggel-Umzug Oobestralch 	Schluuchete 	Fasnachtsföür 

Mehr Info unter [www.fasnacht-aesch.ch](http://www.fasnacht-aesch.ch) oder uf unserem neue FasnachtsApp

## Episode 11.11. – Fasnachtseröffnig Gebenstorf

Für alli Fasnächtler isch dr 11.11. natürlich e speziells Datum. Do wird nämlich die fünfti Jahreszit iglüte!!! Au für uns hets an däm Frittig Obe gheisse, versammle im Lokal, Instrumänt in Ahänger verstaue und no Eine an dr Bar bim Chällerteam bstelle bevors denn mit em Bus in Richtig Aargau gange isch! Natürlich simmer im Kostüm und mit Larve unterwägs gsi, wie sich das ghört. Will mr jo die Saison nur wenigi Car-fahrte händ, hämmer mir die 1stündigi Fahrt bsunders gnosse, mit gueter Musig und edle Tropfe... oder so ;-

In Gäbischtorf acho, hämmer mol gluegt was uf däm Platz so alles los isch. Lüt hets rächt viel gha, die ersch Guggen het scho gli uf dr Bühni gspielt und mir hän uns am Grill verpflägt. Es het au e ganz guete Barwage gah, in däm aber so früh am Obe noni viel los gsi isch, aber das het d'Schlösslis jo no sälte gstört. Gli scho hän mr denn au d'Instrumänt packt und unsere Ufftritt uf dr openair Bühni isch agstande. Mir hän richtig Spass gha unseri Stückli z'präsentiere, will genau für das üebe mir jo au s'ganze Johr dure. Nächst däm tolle Ufftritt hämmer denn d'Instrumänt au scho wieder in Ahänger versorgt und händ uns wieder unter d'Lüt, oder besser gseit in Barwage zruggezoge. D'Stimmig unter uns Matrose isch immer besser worde, je länger dr Obe gange isch. Mir hän dä Barwage grock! Viel meh wott ich do jetzt gar nid drzue säge! D'Fasnachtssaison isch definitiv eröffnet gsi Wie gwohnt so um die 1 umme hämmer uns denn ufe Heiwäg gmacht. Dr Godi het uns wie immert sicher und guet uf Aesch heime brocht! Und no eins wotti Allne mitgäh... ässed kei Popcorn im Car... das chunnt nid so guet ☺

Matti-Babbe-Fischi





## Heimspiil 19.11.2016



Am 19. November 2016 isches wieder sowit gsi. D'Schlössli-Schränzer händ zum Heimspiil iglade. Natürlich isch s'plane und organisiere wie jedes Jahr scho lang im gang gsi. Und will sich sone Halle nid vonelei für sone Fescht irtschaftet und dekoriert, isch am Frittig Morge für e Grossteil vo uns Aträtte gsi! Es het gnuag Arbeite gäh zum erledige. Teppich usslegge, Bar-Element ihne Trage, Absperrgitter platziere, Chuchi bereit mache, Bonkasse uffstelle, Obekasse uffbaue und Harasseburg uffbaue... Jä, mir händ das Jahr e Bierbar gha, wo me verschieden Bier (vo hell bis dunkel) het chönne bstelle. Und irgendöbber hett denn d'Idee gha, mit hunderte Harasse e öbbe 4 Meter hochi „Burg“ z'baue! Schön hets ussgeh... aber isch scho länger gange bis das Teil gstande isch. Nachdäm s'Gröbschte uffbaut und gstande isch, hämmer wie gwohnt s'Programm probt und denn simmer langsam heime... oder ins Pub.

Am Samschtig Nomitag sind denn no die letschte Fiinschliff gmacht worde, so dass mir rächtzittig füre Sponsoreapéro parrat gsi sind. Näbe Snacks und z'Trinke wo serviert worde sind, hämmer de Sponsore mit 2 Stückli e Freud gmacht und uns grad igspiilt. Denn punkt Siebeni hämmer denn Türöffnig gha. Mir händ öbbis ussprobiert und für die erschti Stund e Bier-Happy Hour offeriert... churz 2 für 1. Und Tatsächlich hämmer s'Gfühl gha, d'Gaschtguggene und au s'Publikum sind bitz fröhner in d'Halle cho und händ vo däm Agebot profitiert. Also am Zapfhane hämmer ämmel Bier um Bier usegloh... e Standleitig wär hilfrich gsi ;-)  
s'Fescht isch ins laufe cho und d'Guggene händ uff dr Bühni Al-



les gäh! D'Stimmig isch guet und au scho gli ussghasse gsi. Zwüsche de Guggene hämmer das Jahr ufe Live-Band verzichtet. Drfür hämmer dr Heller vom Radio NRJ als DJ engagiert. Er het jo au e Heimspiel gha z'Aesch und ihm hets Spass gmacht und s'Publikum het e freud gha! Dr Heller het ganz im Stil vom Radiomaa dr Obe lang Liederwünsch erfüllt und isch vor luter Selfies mache mit de Fans chum me zum Ufflege cho ;-)  
Es het zwar wieder e bitzli weniger Bsuecher gha wie im Vorjahr...drfür sind d'Gäschte sehr konsumationsfreudig gsi. Ob an dr grosse Bar, in dr Chuchi oder an dr Bierbar, überall isch flüssig ussgschänkt worde und Ässe übere Trese gange. S'Erschtmol isch unser Shotwägeli dure Shot-Bar ersetzt worde. Me het dort nid numme Shots chönne chaufe, sondern au mit e bitzli Glück an dr „Ringwand“ e shot for free chönne zu sich näh. Au die Neuerig in dr Form vo dr Shot-Bar isch e volle Erfolg gsi!

Wie immer isch d'Zit viel z'schnäll verbi gange und mir händ unseri Gäschte müesse ufe Heiwäg schicke. S'Uffruume hämmer jetzt also wirklich langsam im Griff, und somit simmer dank däm jede apackt het, scho um die 6i fixfertig gsi mit Putze! Fascht zfrüh fürs Nochspiil bim Schanggi... Natürlich het ei Telefon glängt, und mir sind ab ins Pub... also ämel e paar vo uns. Luschtig isches gsi wie immer. Me het glache... ändlich mol öbbis trunke... gege schloof akämpft, Ex-Präsidentin nid wölle heime lo goh... bis sie völlig gnärvt, Jagge und Täsche im Pub het lo ligge und sich „stämpfelend“ uf e (witti...) Heimwäg gmacht het. Anderi händ sich bi dr Abrächnig wehemänt gege s'Mineralwasser

uff dr Rächnig gwehrt... „I ha kei Wasser gha!!!!“ bis hüt isch das Wasser noni ganz verdaut ;-)

Au s'Heimspiil 2016 isch e tolle Johrgang mit rundum z'friedene Schlösslis und Gäschte gsi! Me seht sich bi dr Ussgoob 2017 wieder.

Matti-Babbe-Fischi



## Mimösli 14. bis 31. Januar 2017

Scho lang vor dr aktuelle Fasnachtsaison hämmer uns entschiede, d'Vorfasnacht anderscht z'gestalte wie mir uns das bi de Schlössli Schränzer sunscht so gwohnt sind. Dr Verein het e Afroog vom Häßse-Theater becho, ob mir nid wänd am Mimösli mitmache. Es isch eigentlich scho e paar Johr här, wo mir s'erschte mol gfrogt worde sind ob mr wänd mitmache. Und zwar het uns dr Produktionsmanager vom Häßse-Theater, dr Niels Hauck, ame Bummel ufem Barfi gseh spiile und het dänkt... die sölle mol am Mimösli mitmache. Es het aber nie so richtig in unser Programm passt und drumm het sich das verzögeret. Aber jetzt im 2017 isch genau dr richtig Momänt gsi, zum das Projäkt in Agriff z'näh!



E erschts Bild vom Ganze hämmer uns im letschte Herbscht binere erschte Stellprob chönne mache. Dört isches mol drumm gange die Verantwortliche kenne z'lerne und vorallem d'Platzverhältnis uff dr Bühni izschätze. Mir hän schnäll gmerkt, dass do e spezielli Zyt uff uns zu cho wird! D'Probe sind natürlich ganz im Zeiche vom Mimösli gstande. Drei Lieder hämmer ufem Programm gha und an dene hämmer gschafft und gschliffe. In dr Wuche vor dr Premiere, hämmer nomol e Stellprob gha wo denn dr „Häßse“ persönlich unsere Ufftritt für guet befunde het und uns no dr eint oder ander Tipp gäh het, betreffend uffstelle uf dr Bühni und interagiere. Är isch dr Profi und het uns chleini aber feini Tipps gäh. Denn isch d'Generalprob no ufem Plan gstande, wo s'Chrible definitiv agfange het. Me het die andere Teilnähler s'erschtmol troffe und ihne bi de Darbietige chönne zueluege. Dr Ufftritt vo uns isch jetzt nid sooo toll gsi a

däm Obe... aber das söll jo e guets Omen sii ;-)

Denn isch am 14. Januar d'Premiere agstande und e supertolli Zyt het für unsere Verein agfange! Mehr oder minder nervös simmer s'erschtmol in de Katakombe unde ummegschliche und hän uns uff unsere Ufftritt grad diräkt vor dr Pause vorbereitet! Dr Schlag, d'Sousaphone und d'Euphis hän sich denn hinterem Vorhang parat gmacht während die räschliche Blöser sich vorem Publikumsigang parat gmacht hän. Die sind nämlich bim erschte Lied d'Stäge im Saal durab gloffe und händ dr Afang vom erschte Lied „im“ Publikum gspiilt. Dr Ufftritt isch super gsi und mir hän uns jetzt so richtig uff die witere 20ig Ufftritt am Mimösli chönne freue!

D'Platzverhältnis in de Garderobe vo somene Chlitheater (vom gröschte Chlitheater vo Basel) sind denn doch ehnder äng gsi .... Aber will mir uns jo alli soooo gärn händ, isch au das überhaupt kei Problem gsi! Was no ganz wichtig isch in somene Theater, das me ganz liislig isch wenn me sich unterm Theater in de Katakombe uffhaltet...

Psssssssssssssssst! Jetzt nid unbedingt wenn d'Tamboure ruesse, aber wenn d'Schnitzelbänk singe denn scho... meischtens isch uns das au ganz guet glunge ;-) Nach de erschte 2-3 Ufftritt hämmer gwüsst wie dr Chare lauft, und e gwüssi Routine het afo spiile. Unseri Ufftrittszeit isch immer so um die 20ab 8ti gsi. Das heisst, d'Schlössli sind spötischstens um die viertelvor itruudlet, denn ab ins Kostüm, no eins in d'Künschtler Klause go näh und denn so um die 8ti wieder richtig Garderobe, wo uns dr Sascha (Er isch dä wo gluegt het das alli zur richtige Zit uff dr Bühni und wieder drab sind) übere Lutsprächer dure gäh het, wenn mr uns müen parat mache. Die erschi Durchsag isch für dr Schlag gsi. Dä het denn sini Pauke und Schlagzüg packt und het d'Instrument hinterem Vorhang ganz liislig uffgestellt. Die zweiti Durchsag öbbe, 5 Minute vorem Ufftritt het denn für Alli golte. Und die Durchsage sind mit jedere Vorstellig kreativer und luschtiger worde, was oftmols au mit Vorkommnis vom Vorobe ztue gha het ;-) D'Posune und d'Trumpete sind sich vorem Saal go parat mache, und dr Schlag und dr räschtliche „Bass“ (Sousi und Euphi) sind hintere Vorhang uf dr Bühni gstande. D'Angi unseri Majöse ;-) natürlich au! Vor uns isch e Rahmestückli gloffe, wo dr Basel Citytour Bus ufs Korn gnoh het. E super Nummere wo s'Häßse-Ensemble zum beschte gäh het. Und mir wo hinterem Vorhang gwartet händ... händ dr ganz Text au scho gli chönne mitrede... aber nur ganz liislig. An de Reaktion vom Publikum het me schnäll chönne usmache, wie die so druff sin. Vo lächle bis regelrächtem Ussraschte hämmer alles erläbt. Denn wenn dä Citytour Bus bim Hotel drei König „acho“ isch, het alles müesse schnäll go. Applaus, Vorhang zue, Ensemble vo dr Bühni, Requisite sind versorgt worde, Larve abe und denn uffstelle. D'Angi het izellt und d'Sousis händ losgelegt. Dr Vorhang isch uffgange und d'Blöser sind links und rächts vom Publikum d'Stäge abegloffe und stoh bliibe. Es isch e super Effekt gsi, und dr Häßse hets in dr Generalprob scho genial gfunde. Er het gar nüm gwüsst wens das s'Letschmol gäh het das e Gugge „im“, Publikum gspiilt het. Während die erschte beide Lieder, Roxette und Toto, mittelschnäll bis langsam gsi sind, hämmer bim Elton so richtig gas gäh. Ich würd säge mir sind eigentlich immer super acho bim Publikum. Vielleicht isch au dr Eint oder Ander bitz überrascht gsi, was für Sound vo dr Bühni cho isch ;-)





Näbe de Ufftritt wo sehr schnäll routiniert und guet absolviert worde sind, het uns die Zit am Mimösli vieli luschtigi und tolli Momänt näbe dr Bühni beschehrt! Vorallem d'Wuchenänd wärde uns in beschter Erinnerung bliibe. D'Chemie untereinander, aber au mit em Ensemble het gstumme... D'Öbe hän denn meischtens nach unserem Ufftritt in dr Künschtlerklausur bim Stefan und sim Team agfange. Er het über die ganz Zit gluegt, dass mir immer gnueg z'Ässe und natürlich au z'Trinke gha händ. Nachem Änd vo dr Vorstellig simmer denn meh oder weniger zwüsche dr Klausur und em Garderobe Bereich hi und här pändlet. Wie gseit mit em Ensemble, also vorallem mit de Männer, hämmer sehr luschtigi Momänt chönne verbringe, gwüssi Lüt vo uns sind denn au gli namentlich bekannt und berüchtigt gsi. Aber natürlich nur im positive sinn! Es gäb so einigi Episode z'verzelle. Sig das vom Rundlauf im grosse Ruum wo sich d'Tamboure Gruppe Stickstoff igrichtet gha het. Im gliche ruum händ sich gwüssi ehemalige Schlösli-Tamboure denn au uff de Böckli versuecht, ob s'Drummele au no goht. Dr Pingpong tisch het me au chönne zum Bier-Pong tisch umwandle... schiins ;-)

Oder wo mr irgendwann in dr Nacht dr „Fafi-Bean“ ufem Bildschirm entdeckt händ, wo vo Spot zu Spot ghüpft isch.... oder denn het jo schiins eine amene Obe mol so überbord, das er gar nüm heime ins Bett isch, sondern grad in dr Garderobe ufem Sofa pfüuselet het! mir nenne do jetzt kei Name... normalerwiis drinksch jo nie soviel, gäll Andreas :-D Und natürlich hämmer au die eint oder ander spontani Nachtssession in de Katakombe zum beschte gäh... muess jo e Saumeiss gsi sii! Irgendwann so um die halb 2i am Morge het denn dr Dani v.W. mol gmeint... „es isch imfall e Wohnhuus überem Theater...“ jä guet!

Churz, es isch e mega Zit gsi wo mir zämme verbrecht händ, und e riise Erfahrig wo mir so als Verein in dere Form zum erschte Mol hän dörfe erläbe! Alli händ voll mitzoge, d'Stimmig untereinander isch überragend gsi und d'Fasnacht cha jetzt denn cho!

ZÄMME NEUME ANE...

Matti-Babbe-Fischi





# No paar Mimösli Impressione meh...



## 9mol entweder oder mit... Anina Reichenstein

Zoggeli oder Schueh?

Zoggeli!!!

Konfetti oder Rappli?

Rappli

Harlekin oder Waggis?

Waggis

Pub oder Schopfli-Bar?

Schopfli Bar naturlich XD

Kaffi Lutz oder Bleichuugeli?

E Chuugele

Schnipo oder Hornli mit Ghacktem?

Hornli mit Ghacktem

Vorne im Car oder hinde im Car?

Hinde

„Wanderer“ oder „Elton“?

Hmmm je nach Zuestand :P ich sag mol s Elton

Polonaise oder „Line Dance“?

Schlosli Line Dance



Und **jetzt** bleibt **nur** no  
eins z'wunsche...

**E** schoni **Fasnacht!!!** **Me** seht sich **uff** dr **Gass!**

Leserbriefe, Inseratenbestellungen, Artikel,  
Anregungen, Kritik, Lob etc. an:  
[info@schloessli-schraenzer.ch](mailto:info@schloessli-schraenzer.ch)

Merci beschtens  
Matti-Babbe-Fischi

[www.schloessli-schraenzer.ch](http://www.schloessli-schraenzer.ch)